

**Sud Bosne i Hercegovine**
Суд Босне и Херцеговине

Broj: S1 3 Iž 031488 19 Iž
Sarajevo, 17.01.2019. godine

IZVORNİK

Sud Bosne i Hercegovine u Sarajevu, u apelacionom vijeću sastavljenom od sudija Mirsada Džindo, predsjednik vijeća, Zvezdana Antonović i dr Branko Morait, članovi vijeća, odlučujući o žalbi političke stranke Stranka Dijaspore Bosne i Hercegovine, sa sjedištem na Ilidži, ulica Senada Fazlića broj 58, koju zastupa Fejzić Edin, predsjednik stranke, izjavljenoj protiv odluke Centralne izborne komisije Bosne i Hercegovine broj: 03-07-6-454/18 od 20.12.2018. godine, zbog kršenja Zakona o finansiranju političkih stranaka, u nejavnoj sjednici, održanoj dana 17.01.2019. godine, donio je

R J E Š E N J E**Žalba se odbija.****O b r a z l o Ź e n j e**

Odlukom Centralne izborne komisije Bosne i Hercegovine (u daljem tekstu: CIK BiH), broj i datum navedeni u uvodu, utvrđeno je da je politička stranka Stranka Dijaspore Bosne i Hercegovine odgovorna što je u 2016.godini :

- a) finansijska sredstava u iznosu od 36.425,17 KM koristila u većem iznosu od utvrđenog programom utroška sredstava, čime je prekršila odredbe člana 4. stav 1. Zakona o finansiranju političkih stranaka
 - b) nije vodila poslovne knjige na način koji je utvrđen zakonom i drugim propisima u skladu sa Zakonom, nije uspostavila tačnu evidenciju o prihodima i rashodima i obavezama, čime je prekršila odredbe člana 11 stav 1. i člana 12. stav 1. Zakona o finansiranju političkih stranaka
 - c) nije troškove kampanje iskazala u finansijskom izvještaju za period od dana podnošenja prijave za ovjeru za izbore do dana ovjere rezultata Lokalnih izbora održanih u oktobru 2016.godine, čime je prekršila odredbe 12. stav 3. Zakona o finansiranju političkih stranaka i nije podnijela finansijski izvještaj Centralnoj izbornoj komisiji BiH u skladu sa Zakonom o finansiranju političkih stranaka i Pravilnikom o godišnjim finasijskim izvještajima političkih stranaka, čime je prekršila odredbe člana 12. stav 4. Zakona o finansiranju političkih stranaka i
 - d) nije postupila u skladu sa zahtjevom Centralne izborne komisije BiH odnosno nije dostavila dodatnu dokumentaciju, čime je prekršila odredbe člana 12. stav 5. Zakona o finansiranju političkih stranaka,
- pa joj je na osnovu člana 15. stav 2. i primjenom člana 19. stav 1., tačka a), f), g), h) i i) Zakona o političkim strankama izrečena :

- 1) za povredu iz stava 1. tačke a) novčana kazna u iznosu od 1.000,00 KM,
- 2) za povredu iz stava 1. tačke b) novčana kazna u iznosu od 500,00 KM,
- 3) za povredu iz stava 1. tačke c) novčana kazna u iznosu od 1.000,00 KM i
- 4) za povredu iz stav 1. tačke d) novčana kazna u iznosu od 500,00 KM, odnosno jedinstvena novčana kazna u iznosu od 3.000,00 KM.

Žaliteljica je blagovremeno uložila žalbu na navedenu odluku zbog pogrešno i nepotpuno utvrđenog činjeničnog stanja, povrede odredbi Zakona o finansiranju političkih stranaka. Navodi da je tačno da je Stranka Dijaspore BiH finansirana u 2006.godini iz budžeta, da je bilo trošenja sredstava, ali da se iz obrazloženja odluke ne vidi na koji način je utvrđeno u koje svrhe su utrošena navedena sredstava. Također se ne vidi da se radi o nedozvoljenom korištenju navedenih sredstava. Smatra da je izrečena kazna prestroga, te da stranka nije kažnjena za bilo kakve propuste. Smtara da je opravdano izricanje blaže novčane kazne ili opomene.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Žalba nije osnovana.

Prema stanju u spisu predmeta, Centralna izborna komisija BiH razmatrajući Preliminarni izvještaj o reviziji godišnjeg finansijskog izvještaja Službe za reviziju finansiranja političkih stranaka za 2016.godinu i postizborni finansijski izvještaj– Lokalni zbori 2016.godine političke stranke Stranka Dijaspore Bosne i Hercegovine broj 03-07-6-654/17 od 31.07.2018.godine utvrdila slijedeće činjenice:

Kontrolom poslovnih knjiga i dodatne dokumentacije utvrđeno da je Stanka Dijaspore BiH u Planu troškova za 2006.godinu planirala utrošak od 100.000,00 KM, a da je finansijska sredstva osigurana za finansiranje političke stranke utrošila u većem iznosu za 36.425,17 KM. Dalje je utvrđeno je navedena sredstava žaliteljica nije utrošila za ostvarivanje ciljeva utvrđenih Programom i Statutom stranke, odnosno Planom troškova, čime su prekršene odredbe člana 4. stav 1. Zakona o finansiranju političkih stranaka. Navedeni Preliminarni izvještaj je u skladu sa odredbom člana 14. stav 3. Zakona o finansiranju političkih stranaka („Službeni glasnik BiH“, broj 95/12) (u daljem tekstu Zakona o finansiranju), dostavljen političkoj stranci na izjašnjenje.

Centralna izborna komisija BiH je po službenoj dužnosti, Zaključkom broj 03-07-6-454/18 od 17.10.2018.godine, pokrenula postupak utvrđivanja odgovornosti protiv žaliteljice, zbog osnovane sumnje da je ova politička stranka u 2016.godini kršila odredbe Zakona o finansiranju političkih stranaka.

Članom 4. stav (1). Zakona o finansiranju propisano je da finansijska sredstva iz člana 3. stav (1) ovog Zakona, politička stranka može koristiti isključivo za ostvarivanje ciljeva utvrđenih svojim programom i statutom.

Neosnovan je navod žaliteljice da je izrečena kazna prestroga, te da stranka nije kažnjavana za bilo kakve propuste, te da je opravdano blaže kažnjavanje odnosno izricanje opomene. Naime, CIK BiH je prilikom izricanja novčane kazne kao

olakšavajuće okolnosti upravo cijenila činjenicu da žaliteljica do sada nije kažnavana prema odredbama Zakona o finansiranju političkih stranaka.

U odnosu na prigovor u pogledu visine izrečene novčane kazne, apelaciono vijeće ističe da su za povrede odredaba Zakona o finansiranju političkih stranaka iz stava 1., tačka b) i d) pobijane odluke izrečene kazne u minimalnom novčanom iznosu propisanu odredbom člana 19. stav 1. Zakona o finansiranju političkih stranaka. Navedeni zakon ne propisuje opomenu kao sankciju za povredu odredaba Zakona o finansiranju političkih stranaka, pa se stoga ista ne može niti izreći.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj 19/02, 88/07, 83/08 i 74/10), valjalo odbiti.

PREDSJEDNIK VIJEĆA
S U D I J A
Mirsada Džindo